

Escandalo di piscina olimpico ta un "Watergate"

ORANJESTAD(AAN) Te hasta e bacterianan cu ta broei den e piscina olimpico na Savaneta lo mester a haya e spanto di nan bida, ora cu e escandalo y debacle di e piscina aki a cuminsa sali den publicidad pasobra hopi di esnan involvi den e proyecto a kere cu cos lo keda tapa.

Hopi deportista a yega di lucha incansablemente pa logra diferente proyecto deportivo na Aruba y pa e piscina olimpico na Savaneta un di e gran deportistanan di Aruba cu a haci mas pa por logra e piscina, tabata señor Roly Bislip kende a cruza laman entre Aruba y Venezuela pa asina haya apoyo pa e proyecto di un piscina olimpico na Savaneta.

Ta tristo pa constata awor despues di tanto aña di lucha pa por logra un piscina olimpico, cu net señor Bislip kende ta parlamentario pa AVP, awor bao di maneho di su partido AVP den gobierno, Savaneta ta haya un piscina cu no ta sirbi y pa colmo bao di nanishi di Roly.

Proyecto di piscina olimpico mester bay parlamento

pa ser investiga pasobra no por ta asina cu 7 miyon florin (si tur cos ta segun loke ta poni riba papel) a ser gasta pa traha e piscina y un experto internacional ta bin constata cu e piscina no ta sirbi y mester trece remodelacion grandi y profundo na e piscina, pa esaki por sobrevivir e siguiente decada.

Siete miyon florin gasta den e proyecto y un experto no ta duna e piscina chance pa sobrevivir ni un decada mas!!!

Si no tabata tin parlamentarianan y ministranan cu a haya nan cabeynan ta rijs ora cu nan a lesa un parti di loke a pasa cu e proyecto di piscina na Savaneta, anto ta riba mal caminda mes Aruba su gobierno y parlamento ta.

Segun informacionnan cu DIARIO a haya den transcurso di dianan cu a pasa, a bin resulta cu un compania di Merca lo a ofrece Aruba pa construi e piscina aki pa e suma di 1.8 miyon florin, cu e garantia cu Aruba lo haya un piscina olimpico segun reglanan internacional.

Si ta asina, anto ta ken a haya e oferta aki y ta di con

gobierno y den e caso aki ministro Vos y DOW no a haci uzo di tal oferta pasobra e proyecto no a cay bao di nan!?

Ta di con ministro di OLA cu tabata encarga cu deporte no tabata involvi den e proyecto?

Por ta asina cu e proyecto aki tabata otro fastball cu a ser pasa entre e partidonan AVP y OLA pasobra e proyecto no tabata bao di encargo di ministro Beke su departamento di deporte, siendo cu un instalacion deportivo mester cay bao di e cartera di deporte.

Ken tabata e parlamentario cu durante cu construcion tabata andando y tabata tin hopi critica, pero tog e parlamentario a bay bisa publicamente cu e proyecto ta canando mas mihor cu nunca?

Ta campaña electoral a pone cu den pura mester a core traha e piscina pa asina gana voto den pueblo?

Ken a hiba control riba ehecutacion di e proyecto mientras cu esaki tabata andando?

Ta ken den DOW tabata encarga cu e proyecto y ta ken ta e expertonan cu DOW y departamento di ministro Vos a consulta prome y durante cu e proyecto tabata den ehecutacion?

Ta ki sorto di garantia pais Aruba a haya di e companianan cu tabata involvi den ehecutacion di e proyecto pasobra awor ta bin resulta cu un gran parti di e 7 miyon gasta na piscina di Savaneta ta placa benta afor!!

Gobierno mester bay duna cuenta na pueblo, con nan ta bay exige garantia di esnan cu a traha e piscina pa e proyecto di 7 miyon pasobra awor mester bay percura pa remodelacion profundo di e piscina mester worde ehecuta sin cu esaki ta bay costa pueblo mas placa.

Gobierno por muestra pueblo ki sorto di garantia e proyecto aki tabata tin?

Segun informacionnan cu DIARIO a haya, e sub contractor cu lo a traha e piscina y den e caso aki cu ta tur mal bruha, lo a baha na awa dia bieue y e no ta na Aruba pasobra e compay aki tabata un contratista extranhero cu nunca por a traha ni un badkuij, corda pa papia di un piscina.

Ayera redaccion di DIARIO a haya un monton di yamada di hendenan cu tabata den e proyecto y cu a keda sin haya nan placa.

Diferente di nan a duna di conoce cu trabaonan ilegal di construcion a tuma lugar prome cu e fecha oficial di construcion y prome cu tur cos tabata legalmente regla riba papel.

Gobierno por splica pueblo ki garantia gobierno a haya di e contratistanan cu a traha e piscina y si nan tabata tin experiencia y expertisio riba

tereno di proyecto di piscina?

Gobierno por muestra pueblo y parlamento raportnan di estudio nan haci riba e proyecto di piscina cu por hustifica loke a keda construi?

Si segun calculacionnan e piscina por a ser traha pa 1.8 miyon florin, ta unda e 6 miyon florin extra a bay pasobra e experto cu mester a evalua y inspecciona e piscina, a duna di conoce den su raport cu mester bin un remodelacion profundo y esaki ta encera cu mester bolbe bay gasta hopi placa riba un proyecto cu ya a costa millones di mas.

Si e contratistanan cu a traha e piscina tabata tin experiencia o expertonan pa guia nan, anto ta di con segun e experto internacional; ni e lugarnan pa cambia paña no a ser traha manera mester ta!!!

Den e raport di e experto cu a sali te for di Spaña pa bin inspecciona piscina na Aruba, e ta duna di conoce cu "dimension y organizacion di e lugarnan di cambia paña ta altamente cuestionable y den su opinion esaki ta responde na un profundo desconocimiento di cual ta y mester ta un instalacion di e caracteristicianan di e piscina di Savaneta".

Esaki ta otro berguenza nacional pa Aruba, cu un experto internacional ta constata cu esnan cu mester a construi un piscina cu a costa 7 miyon florin, no tabata tin ni e minimo nocion con pa traha lugarnan di cambia paña!!!

Gobierno a permiti companianan traha riba un proyecto miyonario y nan no por a ni traha hokinan caminda hende mester cambia paña; si esaki no ta mal maneho anto ta con gobierno ta yame anto!!!

Secretarionan di Costa Linda honra riba nan dia



ORANJESTAD (AAN): E secretarianan di e diferente Departamento den Costa Linda Beach Resort, a ricibi un trato di rey ayera riba Dia di Secretaria.

Na e ocasion aki, gerencia a hiba e secretarianan aki pa nan disfruta di un tremendo almuerzo den un di e restaurantnan cu ultimamente ta mas comenta na Aruba,

esta Le Dôme Restaurant.

Fotografo di DIARIO tabata presente y a ripara cu e secretarianan a aprecia e gesto aki un mundo.

Gobernador a nombra Mr. Henny

Eman como formador

ORANJESTAD (AAN): Ayera mainta 22 di April, Gobernador mr. Olindo Koolman a nombra mr. Henny Eman como formador.

Cu e nombramento aki ta cuminsa un fase nobo pa cu formacion di gobierno. Como parti di e responsabilidad di Formador, mr. Henny Eman lo bay hiba combersacion cu

e partidonan politico, gremionan y varios otro grupo den comunidad. Despues di esaki lo bay sinta na mesa cu e partidonan politico cu a muestra boluntad pa forma parti di e gobierno nobo pa guia e proceso di trahamento di un programa di gubernacion pa 1998-2002.